

原刊景印

民國佛教期刊文獻集成

任繼愈題



民國佛教期刊文獻集成

任繼愈題

第 138 卷



大 雲

中國書店

第八號

大

第七十四期

雲

本社啓事一

本社此次擴充月刊原擬照前旬刊辦法凡愛閱者祇收寄費不取報資以期普結法緣而廣宣傳詎所募得基金不敷尙鉅預計尙未能支持一載根柢未固必致等於曇花誠不足以冀閱者之望特宣言已久不得不趕先出版以爲徵信除於本刊另啓再請求熱心同志繼續廣爲募集外爰變通辦法暫時減少篇幅兼收印刷費以資維持而利周轉一俟基金有着即當加意增進仍再贈閱以達同人等之初願這祈海內外 慈善諸大居士有以曲諒苦衷共加扶掖俾得繼續增高久而彌光同人等有厚望焉

本社啓事二

本社同人學識淺陋歡迎社外投稿惟須與本刊所定體例相符來稿必繕寫正體排定以十六字爲一行不

可潦草參差以省轉錄之勞且當予本社以筆削之權登與不登原稿恕不寄還

本社啓事三

本社前曾編發募冊請求海內外佛學同志廣爲代募已將所收數冊各芳名陸續在本旬刊先後鳴謝計未收者尙有十餘處茲特再將代募諸公姓名於此期本刊內另啓揭布催繳除此所載數處外恐無是派人在外募緣各界 慈善諸君倘願贊助請直接寄交本社出版部王蓮航君處掣取收據並隨時登入本刊誌謝以爲徵信恐生誤會特此登告

本社啓事

本刊擴充伊始同人等學理粗淺編制諸多缺點還望海內外 大善知識有以匡其不逮俾得增進而臻完美是所望焉

本月刊編輯體例

(一) 論說。本我佛大慈普度之旨。專發揮解決世出世法重要問題、與改進家國、及宏揚佛化、普利人羣各主義。

(二) 著述。凡關於佛學各經論、及各宗要義之闡揚者。

(三) 文苑。序跋、傳記、碑銘、詩詞、歌偈等之有關佛化者。

(四) 事紀。凡關於現世因果、及近賢修證、或奇異事蹟之足資佛理研究者。

(五) 宏護。海內外關於提倡佛化、擁護三寶之各事實入之。

(六) 融通。凡與佛理相通、無論何種學說、均得分別取去、互相引證、以廣化導。

(七) 慈濟。勸導戒殺放生、奉行衆善、及各團體舉行放生、興辦各種善舉、有足稱

述者、咸歸此類。

(八)衛生。菩薩度生。首重五明。進德修業。端賴色身。凡關於衛生健康。調護疾病。與簡效急救各種單方及防疫諸法。均入之。

(九)評議。凡時事之有礙於佛化推行。及局外妄肆譏嫌。得加以持平之評議。以資擁護。

(十)通訊。海內外宏化機關。及慈善團體。或由個人互函往還。凡有關佛化。不涉私事者入之。

(十一)雜纂。若遊記。若讀書錄。及研究所得之零金碎玉。凡無所歸類者。入之。

(十二)附錄。凡本社集會記事。及各種特載。隨時入之。

以上十二類。不拘語體文言。皆歡迎投稿。但稿字必請筆畫清楚。勿寫潦草。每行以十六字爲准。俾易於排印校勘。一經登載。當將本刊奉贈。其有長篇巨製。再當加酬佛學書籍。以答雅誼。

大雲月刊募集基金啓

猿猴進化。人禽斯判。彝倫攸叙。言教是崇。家喻戶曉。聖人猶病。始制文字。化洽蠻荒。觀照以起。實相乃證。其在內教。曰三般若。惟民因教立。道由人傳。消長之機。邪正判焉。擿埴索塗。同陷於淖。世變民弊。良足悲已。溯自賢聖不作。正教式微。慧光曖曜。異喙爭鳴。歐化東漸。科學代興。機械日新。工於殺人。貧富懸絕。大亂之媒。社會均產。乘機竊發。勞工神聖。抑而後起。帝國主義。好鴛侵略。進化論主。競煽其風。播爲聲教。日獎鬭爭。文明之母。厥唯學說。毒中人心。變亂靡窮。懸想天國。宗教所尊。聽命上帝。亦等專橫。哲學家言。迷離惘恍。情識所至。遂起能所。儒宗淡泊。首嚴義利。迷於苦樂。何繫人心。自由解放。舛理乖倫。獸慾文明。漫不知恥。凡諸邪說。咸墮斷常。高尚生活。務熾我執。偏於常見。逐物恣睢。意識錯覺。或病悲觀。偏於斷見。撥無因果。極其流弊。敢

於一逞。奧德之戰。海水羣飛。回首邦國。鐵血方殷。溺此不返。人類胡存。雨雪之霰。於斯形朕。魔外乘間。亦思簞弄。心外取法。自障正覺。牛鬼蛇神。無所不呈。引朋嘯侶。妄談接度。昌言同源。淆訛朱紫。謗法誣聖。同陷王難。自非慧眼。鮮不盲從。哀茲衆庶。末由振拔。興言救世。端賴佛化。行無緣慈。悟真空理。四相不生。爭競誰起。萬法唯識。因果齊彰。圓歸一心。不取不捨。教綱宏張。隨類向化。高邁羣教。利無不收。廣大圓滿。蔑以加矣。同人等本此悲懷。自忘謏陋。集社講學。以出旬刊。高樹法幢。俾端趨向。摧邪顯正。力挽頽風。拮拘流通。將垂兩載。薄海內外。同志咸稱。益加奮勵。冀進月刊。擴充篇幅。以廣法施。限於資力。基本尙虛。原始要終。仰賴集腋。用呼將伯。從事唱緣。所望熱心世道。慈善長者。慨布囊金。共襄勝舉。兼出身手。廣爲集成。既揚佛化。復濟羣倫。檀度宏修。福因具足。自他等度。莫此爲良。敢塵慧照。毋辜神贍。謹啓。

大雲月刊第八號目錄

＊論說＊

華嚴原人論合解(續)

圓覺法師

婦女學婦之規範

太虛法師

敬告負宏揚佛法之責任者請以佛戒爲先導

歸元

佛 Buddha

英施恩得博士

＊著述＊

淨土三要述義(續)

駱季和

＊文苑＊

紹興偏門外裴江村興教禪寺募修大殿疏

印光法師

＊通訊＊

濟南淨居寺聖水井建築亭欄記

陳嘉遜

濟甯保節會募捐啓

潘對堯

王蓮臺居士生西紀實

王蓮航

古德示衆法語書後

釋曼香

南洋佛教聯合會宣言

覆周智茂居士書二

印光法師

致顯蔭法師函

徐文麗

廣東弘法佛學社致本社駱季和書二

寶靜法師

南洋佛教聯合會致本社書

上某大師書

潘對堯

＊ 事 紀 ＊

南洋佛教聯合會建設大綱

怪魚記

石 麟

西人之歸依三寶

雷擊淫惡

邱瘦蝶

東方文化研究院之組織

管家狗

王連航

太虛法師組織佛教演講團

奇哉怪也的一個死和尚

雪 錐

＊ 慈 濟 ＊

平山堂前之鬼話

觀 光

本社慈濟部放生組簡章

＊ 附 錄 ＊

漢口佛教會宏法利生之一班

本社慈濟部放生組第七期報告

星洲講經會法會圓滿

太虛法師本日返國

無錫女蓮社祈禱和平

杭州松木場彌陀寺重訂念佛道場規則通告

日本佛教團由京抵蘇

祝辭

周伯道

莽莽孽海

貪嗔癡熾

因果循環

不知顧忌

慈意大雲

翔騰覆庇

暮鼓晨鐘

人天普利

喚醒沈迷

宏揚救濟

景行芳規

高山仰止

論說



華嚴原人論合解

唐圭峯蘭若沙門宗密論

元長安開元寺沙門圓覺解（續）

又言貧富貴賤。賢愚善惡。吉凶禍福。皆由天命者。

此又按定外宗天命以立難也。儒者多執天命。先儒解云。命猶令也。彼儒宗但以清氣上升。至高無上曰天。

則天之賦命。奚有貧多富少。賤多貴少。乃至禍多福少。苟多少之分在天。天何不乎。

天道至公至平。無偏無黨。何故而有貧富貴賤賢愚禍福多少之異。又復於中貴賤禍天者多。富貴康寧者少。世途目擊。往往如是。天實爾者。則公平安在耶。

況有無行而貴。守行而賤。無德而富。有德而貧。逆吉義凶。仁天暴虐。乃至有道者喪。無道者興。

無行而貴。如荀子所謂勢榮。守行而賤。如任昉自稱素業。無德而富。如何曾日食萬錢。有德而貧。如相如家徒四壁。逆吉義凶者。如姦邪得志。善良遇害之類。仁天暴虐者。如盜跖永年。伯牛短折之類。有道無道云者。如世善人。動輒坎坷。強梁貪暴。觸事利宜。自古迄今。此類常有。世俗每謂天不平。或云天不開眼。故鄧攸無子。人謂天道無知。斯之謂也。

既皆由天。天乃興不道而喪有道。何有福善益謙之賞。禍淫害盈之罰焉。

儒宗執天命。不知自違其教也。書云。天道福善禍淫。伊訓云。作善降之百祥。作不善降之百殃。洪範嚮用五福。威用六極。易謙卦云。天道虧盈而益謙。地道變盈而流謙。鬼神害盈而福謙。坤卦云。積善之家。必有餘慶。積不善之家。必有餘殃。大抵皆謂天道昭然。禍福不忒。今見無道興而有道喪。則似易書之說無驗。且如善良遇害。則福善益謙之賞全乖。姦邪得志。則禍淫害盈之罰相反。按其文而考其實。全成齟齬。故云何有。良以不推業理。但執天命。故禍福有時而倒置也。

又既禍亂反逆。皆由天命。但聖人設教。責人不責天。罪物不罪命。是不當也。

世人見說古今治亂等事。莫不皆謂天數。若由天者。經書所說。只合責天。何但責人耶。如詩書所譏。春秋所貶。曾不譏貶天命。何耶。

然則詩刺亂政。書讚王道。禮稱安上。樂號移風。豈是奉上天之意。順造化之心乎。

既云禍福由天。不在人爲。天乃自然之理。不容增損矣。則詩書禮樂。懲惡勸善。使人遠禍就福。以承天休者。不成空言耶。詩有國風雅頌。善則美。惡則刺。書有典謨。

訓誥誓命之異。皆明二帝三王治世化民之道。孝經云。安上治民。莫善於禮。移風易俗。莫善於樂。凡此詩書禮樂。皆所以規人心於善道者。是以人力而奪造化之權。豈是奉天命而順天心乎。蓋世儒不知感召之端。實由於我。一向歸之天命。不。但違佛教因緣之說。亦違自宗詩書禮樂之本意矣。

是知專此教者。未能原人。

結前儒道外宗未了義也。

二斥偏淺

習佛不了
義教者

佛教自淺至深。略有五等。一人天教。二小乘教。三乘法相教。四大乘破相教。上四
在此

篇中

五一乘顯性教。

在第三
篇中

此五種教。圭峯約義分判。由所被機有五乘之異。故能按教有此五種。言五乘者。一人天乘。二聲聞乘。三緣覺乘。四菩薩乘。五佛乘。（此依華嚴二地及圓覺彌勒章意。從所求法以立乘名耳。）今合聲聞緣覺而開菩薩。故立此五。若依法相宗。

說五種種性者。一聲聞乘性。二緣覺乘性。三菩薩乘性。四不定乘性。五者無性。就不定中復有四類。一聲聞菩薩性。二緣覺菩薩性。三聲聞緣覺性。四聲聞緣覺菩薩性。其無性者。謂總無前三乘種性。今人天教收彼無性。小乘教收彼聲聞緣覺二性。後三教收彼菩薩性。其不定性。中間三教攝之。若依賢首五教者。一小乘教。同此第二。二大乘始教。當此三四。三終教。四頓教。五圓教。當此第五。良以賢首後三。皆約一乘。故圭峯合之。賢首約同教別教。歷位無位開成三異。而彼始教雙收西域空相二宗。以俱未盡大乘法理。故合爲初（初即始也）。圭峯依西域仍爲二。或開或合。各有攸當。不可一準。萬松老師於此論中。立九對十八重。總該賢首圭峯二種五教之義。一苦樂對（以三途對人天）。二人天對（以人對天）。三定散對（欲界爲散。上二爲定）。四色空對（以四禪望四空）。五凡聖對（前四皆凡。後三乘聖）。六大小對（聲聞緣覺小始教。餘皆大）。七始終對（法相爲始。法性爲終）。八頓漸對（始終歷位。頓教不立）。九偏圓對（賢首前四皆

偏、華嚴獨爲回教。是則於賢首小教中曲開前五對。收此論義。可謂辭簡而理盡矣。

一佛爲初心人。且說三世業報。善惡因果。

明人天教。於中總名大意。初心人者。所被機也。對後三乘。故曰初心。一向方便。故云。且說三世業報者。謂過去造業。今世受報。今世造業。來世受報。故曰三世業。即能招之因。報即所招之果。然業與報。皆通善惡。故曰善惡因果。如下廣明。

謂造上品十惡。死墮地獄。中品餓鬼。下品畜生。

先叙惡因果。言十惡者。謂身三殺盜淫。語四妄言兩舌惡口綺語。意三貪瞋邪見。言上品者。泛說善惡皆有三品。三位明之一約境。且如殺生。殺人爲上。殺畜爲中。蚊蚋爲下。不殺反此。謂不殺人爲下。不殺蚊蚋爲上。二約心。不論善惡。但猛利心作爲上。泛爾心爲下。庸庸爲中。三約時。若善若惡。但三時無悔爲上。二時無悔爲中。一時爲下。言地獄等者。梵語捺洛迦。此云苦器。即衆生受苦之器也。今言地獄。

約義立名。有云。地者。底也。獄者。局也。地下有獄。故名地獄。總有四類。謂八熱。八寒。近邊。孤獨。言八熱者。一曰等活。謂刀劍剗斬。成千萬段。以叉撥聚。唱言活活。彼即便活。活已復斬。斬已復活。故曰等活。以四王天壽五百年。一諸天壽量。下自有文。一爲一日一夜。如是積數至五百歲。二曰衆合。衆山四合。碎罪人身。猶如微塵。以忉利天壽一千年。爲一日一夜。積此歲月。壽一千歲。三曰黑繩。如世解木。繩抨鋸解。以夜摩天二千年。壽爲一日一夜。壽二千歲。四曰號叫。以兜率天壽四千年。爲一晝夜。壽四千歲。五大號叫。以化樂天八千年。壽爲一晝夜。壽八千歲。六曰炎熱。以他化天一萬六千年。壽爲一晝夜。壽一萬六千歲。七曰極炎熱。壽半中劫。謂從人壽八萬四千歲時。百年減一歲。減至十歲。名半中劫。爲此獄壽。八曰阿鼻。此云無間。有五義。故立無間名。一者作業無間。約治罰說。二者受報無間。約果報說。三者受苦無間。約楚痛說。四者壽命無間。無中天故。五者身量無間。謂衆生自業。各各自見身滿獄。中間無空處。故曰無間。此獄壽命。一增減劫。言八寒者。一曰按部。